



سلام عليكم ورحمة الله عاملين ايه يا شباب
يا بنات؟ اخباركم ايه؟ الله يبارك فيكم يا رب
ويرضى عنكم. عاملين ايه؟ يا رب تكونوا
بخير ده الجزء الثاني من لايف الجامعة
وسنينها فاكرين المرة اللي فاتت؟ كنا
بدأنا اللايف دوت حضر عدد كبير اوي منكم
اتكلمنا على حاجات معينة متعلقة بالجامعة.
النهارة بإذن الله سبحانه وتعالى هنكمل في
نفس الموضوع لأن احنا المرة اللي فاتت يعني

ما لحقناش نكمل الموضوع خالص. ويا دوبك
تكلما في كم نقطة ولسه في نقط كثير متعلقة
بالجامعة وسنينها هنقف معها النهاردة. آآ اه
خاربينها فعلا يارب تكونوا استفتدم من
اللايف المرة اللي فاتت اه تابعته او اللي
متابعهوش سمعه ولو بعد ماخلصناه لإن
اللايف دوت واللايف اللي فات فعلا يفرق
اوي اوي مع كل مع كل واحد في الجامعة.
هيكون نقطة فارقة جدا في نظرتك للجامعة،
قراراتك اللي هتاخذها جوا الجامعة فأتمنى
اللي ما سمعش لايف الإثنين اللي فات ينزل
تحت في الصفحة كده يدور عليه أو هيلاقيه
على اليوتيوب. فيا رب تكون اللايف ده فرق
معكم.. تمام؟ ربنا يبارك فيكم يارب. طيب
خلونا نبداً. انا بس عايز قبل ما نبداً نكون

عملنا شير سريع جدا للايف خاصة عايزين
نجيب كل الناس اللي في الجامعة دلوقتي.
عايزين نعمل منشئات منشئات منشئات كثير
لكل حبايينا في الجامعة عشان النهاردة اللقاء
يكون أقوى من لقاء المرة اللي فاتت. وهنتكلم
في مواضيع أهم من اللي اتكلمنا عليها المرة
اللي فاتت. تمام؟ مين فاكر اتكلمنا عن ايه
المرة اللي فاتت؟ ايه النقط اللي احنا تطرقنا
لها المرة اللي فاتت؟ حد فاكر؟؟ مش فاكرين
حاجة طبعاً. طيب يلا بينا نبداً وهفكركم. بس
بسرعة اعملوا شير واعملوا منشئين كثير كثير
كثير.....

**الحمد لله وأشهد أن لا إله إلا الله وحده لا
شريك له وأشهد أن محمداً عبده ورسوله
(صل الله عليه وسلم). أما بعد. أهلاً ومرحباً**

بكم في لقاء جديد لايف جديد بنكمل فيه

اللايف اللي فات اللي بدأنا فيه الكلام على موضوع الجامعة ونصائح مهمة جدا تتعلق بالجامعة وسميننا الايف الجامعة وسنينها. واللايف دوت يعتبر الجزء الثاني من لايف الجامعة وسنينها. ليه الجزء الثاني؟ لإن احنا الجزء الاولاني كنا متخيلين إن احنا هنخلص كل النصائح وطبعا ما بيحصلش وإنما يدوبك اتكلمنا ثلاث أربع نصائح بس ولسه في نصائح كتير اوي معانا فكان لازم يتعمل لايف ثاني. المرة اللي فاتت اتكلمنا على مواضيع مهمة منها احنا ليه بنروح الجامعة؟ وايه المفروض النوايا اللي انا انويها لما بروح الجامعة؟ ازاى احول الجامعة دي من عمل مباح عادي لم يكن.. مكنتش متخيل اوي إن

هو ممكن يكون في ميزان حسنات يعني أنا
باعتبر الجامعة دي في ميزان السيئات لا احنا
اتكلمنا ازاى تحول الجامعة دي لقصة
عبودية؟ ازاى تحولها الى عمل صالح تؤجر
عليه؟ اتكلمنا على موضوع النوايا وفهمنا أنا
المفروض أنوي ايه في الجامعة. الجامعة دي
ممكن تكون في ميزان حسناتك. ممكن تكون
في نفس الوقت. في ميزان السيئات. وكل
دوت راجع لايه؟ للنية الأصلية.. احنا بنعمل
اي في الجامعة؟ اتكلمنا باستفاضة في النقطة
دي وبعد كده اتكلمنا على ثلاث نصائح للجامعة
فاكرين؟ ثلاث نصائح للفشل في الجامعة
وقولنا كيف تفشل في الجامعة في ثلاث
خطوات؟ فاكرين الثلاث خطوات ؟ قولنا اول
خطوة إنك أنت، اعمل علاقات مع الجنس

الآخر ، يعني لو أنت ولد اعرف بنات سواء
صحوبية أو حب، لو انت بنت اعرفي ولاد
سواء حب أو صحوبية. دا أسرع طريق للفشل
في الجامعة.. اتكلمنا طبعاً قولنا ليه؟ النقطة
التانية قولنا تفشل في الجامعة إنك انت تكره
الجامعة عشان مش دي الكلية اللي أنا بحبها أو
مش دي اللي أنا كنت بتمناها فأنا قررت إنني
أفشل فيها وأنا مبجهاش

نمرة تلاتة – صاحب ناس فاشلين مالهمش في
المذاكرة ، خبثاء بيخبوا كل حاجة ،
بيحبطوك لو ذاكرت – والكلام دوت –

✍ آخر حاجة اتكلمنا فيها كان موضوع
خطير جداً ، وهو ليه أنا بنصح الشباب ما
يقعوش في علاقة عاطفية في الجامعة أبداً
مهما كان ، مهما كانت العلاقة العاطفية دي

في ظنك سليمة ، وما فيها ش حاجة غلط ، وكده
حتى لو كانت يعني مش هنعمل حاجة حرام
والجوده ، وقلنا ليه ، ليه ، ليه أنا ما
انصحش خالص إن الإنسان يفتح على نفسه
الباب دوت ؟

لأن غالباً الباب ده نهايته مؤلمة وصدمة في
النهاية إن أنت صعب ، إن أنت لو ظروفك
المادية مش نمرة واحد يعني صعب جداً
تتجوز واحدة في سنك خرينا واقعين .

■ اللي عايز يرجع للتفاصيل يرجع للايف اللي
فات ، طيب خرينا بقى نكمل في النصايع .

🔗 النصيحة الأولى - معانا النهاردة في
اللايف دوت ، وهي صدق أو لا تصدق ،
صدق أو لا تصدق ، مرحلة الجامعة هي

أفضل مرحلة في حياتك ، في طلب العلم الشرعي ، طلب العلم الشرعي أعني به أعني إن أنت أفضل وقت في حياتك ، في حياتك وفي حياتك ، ممكن تلاقيه ميسر لحفظ القرآن ، لتعلم الفقه ، العقيدة ، لدخول الدورات المختلفة ، لتعلم العلوم الشرعية ، الإنتماء لبعض المعاهد الشرعية ، أحسن وقت هو وقت الجامعة.

بعض الناس يتخيل العكس يقول : لا ، الجامعة وأنا مشغول فيها ، وما فيش وقت وهنعمل إيه؟! لما أخلص هحفظ قرآن ، لما أخلص هطلب علم ، لما أخلص هخش بقي الدورات بقي اللي كنت بحلم بيها كلها ، وهعمل وأسوي ، نقول له : أنت واهم ، لو

ما عملتش كده في الجامعة مش هتعمل كده
بعد الجامعة.

وقت الجامعة عن تجربة عن تجربة مش
تجربتي أنا بس ، تجربة مئات من اللي شفتم
، هي أفضل وقت في حياتك هتطلب فيه علم.
والموضوع له كذا سبب أصلاً ، كذا سبب .

■ **السبب الأول** ، السبب الأول - إن أنت في
فترة الجامعة غالباً لك نظام ، وعارف راسك
من رجليك ، يعني إيه ليا نظام ؟ يعني أنا
عارف ليا مواعيد ، في أيام عارف بروح
الجامعة في الأيام ديت ، برجع في الأيام ديت
، بروح الساعة كذا ، برجع الساعة كذا ،
فضلاً إن في ميزة رهيبة جداً في أيام الجامعة
وهي إن في حاجة اسمها أجازة ، في حاجة

اسمها صيف ، في ثلاث شهور أجازة ، في
نص سنة ، الكلمة دي إنساها بعد الجامعة
أنسى كلمة الاجازة ، الصيف ، نص السنة.
الكلمة دي آخر مرة هتسمعا في سنة ، آخر
سنة في الجامعة.

وبعد كده إلى أن تلقى الله مش هتسمع كلمة
أجازة ، وصيف ، وتلات شهور أجازة ،
والجو دوت. تمام ؟

أنا ما اعرفش الصيف من الشتاء إلا من
المطر ، يعني يعني ما بعرفش الصيف من
الشتاء إلا لما أولادي يخشوا المدارس ، أنا
غير كده كل يوم زي كل يوم ، ما فيش
أجازات خلاص ، ما فيش رفاهية إن أنا
عندي ثلاث شهور أجازة دي خلاص.

فضلاً إن أنت يبقى عندك سيستم في الحياة
بقى ، هيبقى صعب بعد الجامعة.

إنـت بعد الجامعة ما فيش سيستم ، بعد
الجامعة إنـت وارد تكون تخش جيش ، فطبعاً
وقت رهيب جداً هيضع منك.

وارد بعد الجامعة تسافر تشتغل برة ، تبقى
الحياة مضطربة ، ودوام صبح وليل ، وبتاع.

ممکن إنـت بعد الجامعة تخشي في خطوبة ،
في جواز ، في تجهيز ، في جوزي مسافر
فهسافر معاه ، والدنيا اتكعبت .

فمسألة إن أنت أصلاً عندك سيستم ، دي
مسألة هتفتقدها بعد الجماعة - ده أول ميزة -

❁ أول ميزة اللي هي إيه ؟ إن أنت في نظام

، يعني في نظام أقدر ، هو النظام هيفرق

فأيه ؟ أقدر أعمل جدول ، أقدر أعمل جدول
لنفسي ، أقدر أقول والله هروح الدرس
الفلاني ، أقدر أقول والله مواعيد الدار هحطها
هنا علشان تناسب مواعيد الجامعة ، أقدر
أقول والله أنا خلاص اليوم اللي مش بروح فيه
الجامعة هشد حيلي

شد حيلي فيه في طلب العلم الشرعي عشان
أعوض كذا، والجامعة حتى من جمالها أن هي
ما بتتراحش كل يوم، معلش أتخن واحد فينا
بيروح الجامعة ثلاث أربع أيام في الأسبوع،
أنت بعد كده لما هتشتغل هتبقى بتروح الشغل
ست أيام في الأسبوع، في الجامعة ممكن يعني
تقعد محاضرة أو محاضرتين وتروّح، لكن
الشغل هتقعد تمن تسع عشر ساعات على
الأقل، فإلي عايز أقوله إن أنت لو عندك نظام

في الحياة، أقدر ابني عليه نظام ثاني أسمه
جدول طلب علم، أسمه جدول حفظ قرآن،
نمرة اثنين عندي اجازات.. عندي حاجة أسمها
صيف.. ونص السنة، نمرة ثلاثة أصلا أنا كده
كده ما بروحش الجامعة كل يوم.. بروح
يومين ثلاثة في الأسبوع والباقي قاعد فاضي.

✿ **طيب الميزة كمان؟** الميزة كمان إنك انت

ضامن السيستم ده لمدة أربع خمس سنين.. .
يعني ممكن أقعد على كده أربع خمس سنين،
عارف راسي من رجلي،، أنت متخيل أنت
ممكن تحصل قد ايه علم في أربع خمس
سنين؟ اللي هو بعد كده هتتمنى ساعة فاضية
في علشان تراجع بس القرآن وما فيش أصلا
مش قادر تحضر دروس....

❁ الميزة كمان إن أنت غالباً غالباً بيتصرف

عليك غالب الناس إلا حالات معينة في فترة الجامعة أهلك بيصرفوا عليك... يعني مش بتشتغل، ولا شايل هم حد، ولا شايل هم أسرة، انت بتروح تلاقي أكلك تلاقي شربك تلاقي بتاخذ مصروفك يعني ما وراكش أي حاجة غير إنك تذاكر وتطلب بقى علم شرعي في وقت الفراغ بتاعك.

❁ الميزة اللي بعد كده ميزة جبارة جدا

وهي إن المكنة شغالة يعني ايه المكنة شغالة؟ اسألوا أي حد خلص فترة الجامعة.. لو حد بيحضر دلوقتي معي اللايف مخلص فترة الجامعة هيعرف اللي انا بقوله... إن المكنة مش هتشتغل بعد الجامعة أبدا زي ما كانت شغالة في الجامعة المكنة يعني ايه؟ يعني إنك

جو الجامعة جو طلب علم.. طلب علم...
طلب العلم ممكن يبقى علم دنيوي . بس في
النهاية هو طلب علم هو طلب علم. يعني
مكنة الحفظ والفهم شغالة . لما المكنة تبقى
شغالة أي حاجة تتحط فيها هتسالك لكن لما
المكنة دي تقف بتلاقي صعوبة في إن أنت
تشغلها وتقومها تاني فهي كده كده قاعدة
بتحفظ وبتراجع وبتذاكر وبتفهم العلم الشرعي
شبه العلم الدنيوي. في الحقة دي هو كده كده
العلم الشرعي في النهاية هو عبارة عن حفظ
وفهم أه المادة غير بس هو في الآخر حفظ
وفهم. أنا كده كده في مكنة الحفظ شغالة ومكنة
الفهم شغالة فاللي أنا هعمله هدخل معها
قرآن، هدخل معها فقه، هدخل معها أصول،
هدخل معها مصطلح، هدخل دورة.. هتلاقي

الدنيا بتجري لكن تعال كده واحد طالع من ما
طلع من الكاية، ودخل الجيش وطلع من
الجيش وجاي يطلب علم، بيلقي الدنيا مهنجة
ما فيش الدماغ مش صافية ما فيش الحفظ
بتاع زمان هو كان فاكر أن هو بعد ما خلص
الجامعة نام دماغي هتروق وهحفظ واذاكر. .
ده هي كانت احسن وقت الجامعة لما كانت
المكنة اصلا ايه؟ لما كانت المكنة اصلا
شغالة. تمام؟ طيب.

من المزايا اللي موجودة في الجامعة خطيرة
جدا إنك بتقابل ناس كتير في الجامعة ممكن
يساعدوك على طلب العلم يعني في صنفين
في الجامعة موجودين معك مش هتلاقىهم بعد
الجامعة الصنف الاولاني هو الصلبة اللي
ممكن تساعدني في طلب العلم. يعني أنت

ممکن تتفقى مع البنات يلا بنا يا بنات نطلب
علم. تمام؟

اللى هو خطير جدا وممكن فعلا بعد الجامعة
ما تلاقيهوش هو المعلمة أو بالنسبة للولاد
المعلم. أحياناً بيبقى شىخى فى سنى وأحياناً
ببتبقى الأخت اللى هى المعلمة بتاعتك فى
سنك أصلاً وبتقابلها كل يوم فى الجامعة هو
فيه أجمل من كده يعنى ايه؟

يعنى فى أخت صاحبك خاتمة قرآن
ومعها إجازة وأنتى بتحفظى معها تخيل أنا
أبقى بكون بقابل الشيخ اللى بحفظ معه كل يوم
أو بقبله ثلاث أربع مرات فى الأسبوع...
كنز مش هتلاقيه بعد كده لو أنا كل يوم
سمّعت لها إن شاء الله فى المواصلات حتى
وأنا رايحة وأنا جاية هتحفظى القرآن كله فى

سنة ونص تمام ممكن ما بين المحاضرات
تسمعلي، ممكن في مسجد الكلية تسمع لي،
وممكن كمان تكون المعلمة دي أو الأخ اللي
هو في سنك أو ممكن يكون أكبر منك بسنة أو
أكبر منك بسنتين أنت في أولى وهو في
رابعة أنت في تانية وهو في رابعة المهم إن
أنت عرفت أن في حد طالب علم جامد أو
شيخ.. الأخت دي محفظة معلمة جامدة في
حاجة في العلم ربطت معها تمام؟ تخيل أنت
بتقابله كل يوم ممكن لو قعدتوا في المسجد
ربع ساعة كل ما بتقابلوا بتقروا في كتاب
بيشرح لك حاجة في كتاب هتخلص الفقه في
سنة.. هتخلص العقيدة في ست شهور..
هتخلص الكتب معه قبل ما تطلعوا من الكلية
هتخلصوا كتب كثير... من غير ما تروح

مسجد ولا هروح بقى الدار ولا يقولوا لي ما
تروحوش المسجد ولا ما تروحيش
المعهد... كده كده أنا بقابل المعلم بتاعي أو
بتقابلي المعلمة بتاعتك جوة الجامعة نفسها...
يا بخت اللي تلاقي معلمتها جوة الجامعة....
سواء تلاقي أخت صالحة خاتمة قرآن أو
تلاقي بتحسن شرح فقه أو شرح عقيدة... يا
سلام

والله العظيم يبقى كنز اللي يفوته يبقى قمة
الغباء. مش هتلاقي بعد كده الكنز ده...
وهتدوري بعد كده فين المعلمة وتروحي بعيد
عشان تحفظي القرآن وروحي معهد بقى
وأهلي يقولوا لي ما تروحيش والجو ده طب
ليه ما كان بين أيديك؟ كانت في معلمة في

الجامعة كان في محفظ في الجامعة ما
استغلّوش ليه؟

كل الحاجات دي بتقول لك أن أنت لو ما
طلبتش علم في فترة الجامعة يبقى أنت عندك
مشكلة كبيرة جدا فمن الأمور المهمة جدا أن
تستغل فيها الجامعة إن أنت تطلب العلم
الشرعي. تطلب ايه؟ العلم الشرعي يعني
لازم لازم ومهم للغاية تختم القرآن فترة
الجامعة لأن بعد فترة الجامعة الموضوع يبقى
أصعب خلي بعد الجامعة بقى أوثبتت خاينا
في الجامعة بس نختم ولو ختمة يعني نختم
وخلص. وحاول تخلص مستوى او مستويين
من طلب من طلب العلم صدقوني اللي طلب
العلم في الجامعة بيشكر الله سبحانه وتعالى
دلوقتي.

■ الحاجة الجميلة كمان في الجامعة في الموضوع إنك عندك مساحات كثير فاضية حتى جوة الكلية اللي احنا بنسميها الاوقات البينية ايه الاوقات البينية؟ يعني في وقت كثير في النص كده ممكن أعمل فيه حاجات كثير يعني بين المحاضرة والمحاضرة في ربع ساعة في المواصلات بروح في ساعة برجع في ساعة. تمام؟ حتى الأوقات مهمة جدا... أنتي ممكن يعني تجيبي ورد القرآن كله في المواصلات وأنتي رايحة هتسمعي جزء وأنتي راجعة تسمعي جزء خلاص جبت وردي كده لا وأنا رايحة هحفظ صفحة وأنا راجعة هقعد أراجع خلصت أنا كده ورد الحفظ فممكن في اليوم قبل ما أروح البيت أمون عملت نص طلب العلم الشرعي بتاعي .

ممکن فی المواصلات بحط فی ودانی سماعة
بسمع الدرس اللى أنا عايز اسمعه ما بين
المحاضرات بسمع نص درس هنا ربع ساعة
من درس هنا. مقاطع هنا على ماأروح أكون
خلصت نص طلب العلم هتلاقي فين الترف
ده في الحياة بعد كده معلش ممكن تبقي شائلة
عيل صغير وانت ماشية تمام ماشية مع
جوزك، داخله سوق، مطحونة في شغل
الرفاهية دي مش هتلاقي الروقان ده بعد كده
فأنا بقول اللى مش هيطلب علم في الجامعة
هيندم

ليه؟ أولا في كذا عامل أنا قاعد في مكان كل
الناس اللى فيه تقريبا في سني ممكن أكبر سنة
ممكن أصغر سنة بس..

وقاعد في مكان في آلاف الشباب كله شباب
آلاف من الشباب.. تمام؟

الحاجة اللي بعد كدة إن أنا أكلم أي حد في أي
حاجة ده طبيعي في الجامعة محدش
هيستغربني..

لكن صعب مثلاً أن أنا أقف في الشارع أكلم
حد لأنه بيستغربني أنت موقفني ليه؟ عايز
إيه؟

لكن أنا باكلم حد في الجامعة مهما كان محدش
بيستغرب أن حد بيكلم حد جوة الجامعة.

عادي إحنا في جامعة واحدة، حتى لو سننا
مختلف إحنا في جامعة واحدة في الآخر..

فكرة أن أنا حوالى آلاف في سني أو أكبر
سنة أو أصغر سنة و أن أنا ممكن أكلم أي حد

في أي وقت في أي حاجة و أنا باقعد كثير
مع الناس دي مش بس أن هم موجودين.. لأ
إحنا بنقعد مع بعض كل يوم بالتلات أربع
ساعات. يعني أن أنا أعمل تأثير عليهم على
مهلي طول السنة واخد راحتي وارد. تمام؟

غير أن أنا لي مداخل كثير ممكن أدخل بها
عليهم..

منها أن إحنا نذاكر مع بعض طب أبيّض لكم
المحاضرة طب أشرح لكم اللي فاتكم طب ما
تيجي نقعد مع بعض في المسجد أفهمكم الحنة
دي

وأعرف أجيب رجلين أي حد بأي وسيلة..

👉 وده يرجعنا للنقطة اللي تكلمنا فيها
المرة اللي فاتت: ليه لازم أكون متفوق في
الجامعة؟

ده أحد الأسباب اللي بترجعني للنقطة دي..

إن من المهم جدًا إن أنا أكون متفوق في
الجامعة؛ لأن التفوق في الجامعة غير الاسباب
اللي قولناها المرة اللي فاتت هيعمل لي حاجة
مهمة جدًا. هيفتح لي باب كبير جدًا جدًا للدعوة
إلى الله، وهيووفر كلام كثير قوي، وهيخلي
الزبون يجي لي لغاية عندي غصب عنه.

وأنا هتسلى عليه بقى على مزاجي وءاثر عليه
على مزاجي. لو أنتِ مثلاً أكثر واحدة شاطرة
في السيكرشن بتاعك، تكتبي محاضرات حلوة
والبنات بيصوروا منك، وأنتِ اللي فاهمة

المحاضرة هيحصل إيه؟ هيحصل كل البنات
تتلف حولك من غير حاجة..

بنقابك بكل اللي فيك هيحبوكي على كدة؛ لأن
هم عايزين من وراكي مصلحة.

فهتيجي بعد كدة تقولي لهم طب خلاص نقعدوا
نشرحوا يا بنات. هنقعدوا نشرحوا وأنت
تشرح

يعني ما بلاش يا جماعة الشتيمة، بنات بلاش
الأغاني.

طب مالها الأغاني ؟ تقدي تكلمهم في
الحتة دي طب تعالوا لي البيت أشرح لكم
يروحوا البيت طب أنا يا جماعة هاصلي
تقوموا تصلوا معي طب ما إحنا مش
متوضيين!

طب اتوضوا طب ما بعرفش أتوضأ هعلمك
الوضوء طب يلا نصلي يا بنات طب ما تيجوا
نصوم يوم الخميس؛ أنا صايمة صوموا معايا.

هيجوا صايمين طب ما ممكن إيه رأيكم بعد ما
نخلص شرح أحفظكم آيتين كل مرة؟

يحفظوا القرآن على آخر السنة هتطلعي بعشر
ملتزمات على الأقل.. صح؟

■ حصل ولا ما حصلش؟ ولا أنا بقول كلام في

الهوا؟

فاللي عايز أقوله أن أنا فترة الجامعة دي أنا
أقدر أعمل بها تأثير على شباب أو على بنات.

بنات تعمل تأثير على البنات سهل بس مهم
قوي إن أنتِ تكوني متفوقة لأن أنتِ لو ما

كنتيش أنتِ المتفوقة هيجصل العكس هيجصل
العكس..

هتبقى أنتِ محتاجة واحدة تشرح لك افرضي
بقى الواحدة دي كانت مش ملتزمة خالص؟؟

و وقعت فيها مفيش حل ثاني طبعًا غير إن
البنات اللي مش ملتزمة دي هتأثر على البنات
وهيعتبروها قدوة وهيعتبروك أنتِ مش قدوة.
وبالتالي هيبقى عندهم التبرج ده حلو. والنقاب
ده بيفشل البني آدم . تمام؟ ده أصلًا صورة
مش كويسة إجمالًا المشكلة الثانية إن كله
هيقع في شباكها. بمعنى دي لو قعدت مع
البنات وقالت لهم طب تعالوا أشرح لكم.

دي ممكن عادي هتشتم وهتسمع أغاني
وهتشغل أغاني وهي بتشرح.

لو جابتهم البيت دي ما بتصايش مش هتصلي
مش هتقوم تصلي مش هتخلي واحدة تقوم
تتوضأ في الحمام عندها.

■ فكله هيتكسف يقول لها عايز أصلي.. صح؟

ممكّن تكون بتشرب سجائر أصلاً يعني في
مصائب سوداء في الجامعة دلوقتي. فاللي
عايز أقوله أنا إيه اللي خلاني كدة؟

تقصيرك هو اللي وصل لكدة لو أنت
متميزة في الجامعة ما كانش حصل اللي
حصل..

بدل ما كان الناس هيتأثروا بواحدة ملتزمة
بحجاب واسع بنقاب بقى خلاص قدوتهم واحدة
متبرجة بتسمع أغاني بتصاحب ولاد.

أفسدت كل البنات اللي في السكشن بسبب
تقصير الملتزمة...

فاللي عايز أقوله

■ اه إن إحنا فترة الجامعة فترة مميزة جداً
للدعوة إلى الله / سبحانه وتعالى / بسبب إن أنا
معايا شباب كثير .. بنات كثير في سني ؛
سهولة التواصل.

■ إن الجيل السن ده اصلاً عنده رغبة في إن
هو يتغير ، يعني الجيل ده قابل إن هو يقبل أي
أفكار ، فلو لو أنا لحقته بأفكار صحيحة دينية
بيقبل صدقوني بيقبله.

■ عشان كده مثلاً يقولك هو ليه أهل المدينة آمنوا بالنبي / عليه الصلاة والسلام / وأهل مكة ما آمنوش بالنبي / عليه الصلاة والسلام / في الاول.

■ قالك لنهل المدينة بعد حرب الاوس والخزرج كان في حرب قعدت ما بينهم سنين طويلة كل كبار السن ماتوا تقريباً كل الشيوخ ماتوا مفضلش في المدينة الا الشباب .. الا الشباب.

■ فكان إن الشباب يقبلوا دعوة الاسلام أسهل بكثير جداً من الشيوخ يقبلوا ولكن مكة كان كلها ناس كبار في السن فكان تغيير الأفكار صعب فيهم.

لكن أهل المدينة كانوا شباب ، فكان سهل إن
النبي /عليه الصلاة والسلام/ يَأْثُرُ فِيهِمْ و يغير
فيهم الأفكار ، كذلك مصعب.

■ فاللي عايز أقوله إن أنتِ وأنتِ في فترة
الجامعة أنتِ وسط بنات .. شباب سهل جداً
تشكيل الأفكار، سهل جداً التأثير على الشباب
والبنات في الحقة دي.

■ فاللي مش هيعمل .. مش هيشغل في الدعوة
إلى الله في الجامعة هيفسر كثير اوي.

■ تخيلي مثلاً إن أنت كل سنة بتأثري في
عشرة بس.

يعني تخيلي تطلعي من الجامعة معاك خمسين
ملتزمة، خمسين ملتزمة !!

معلش هو أنت لو أتجوزتي في البيت
ومبتقليش حد ومبتش تغليش هتأثري على
خمسين واحدة إمتى؟ و هتقابلي خمسين
واحدة إمتى؟ و إمتى هتقعدى مع خمسين
واحدة أربع سنين بتكلمى فيهم وبتتصحي فيهم
وبتغيري فيهم هتلاقي فين الكلام ده؟ تمام..

مش هتلاقيه ، ولو حتى أشتغلت في الآخر
هتشتغلي مع مجموعة محدودة في خمسة مع
عشرة يمكن يكون مفيش اصلاً شغلك مفيهوش
حد اصلاً متأمينش غير واحد أو إثنين أو
واحدة أو اتنين، وجو الشغل مفيش حد فاضى
لحد ومفيش حد عايز يركز في كلام في الدين
وكله مطحون في الحياة وخلاص هتلاقي فين
انا الجو بتاع الجامعة ده تاني؟ تمام..

■ والدعوة يا جماعة مش صعبة انا مش بقولكم
ابقوا شيوخ ودُعاة وتبقى علاء حامد وتبقى
محمد الغليظ مش كده.

■ الدعوة يعني أنا عايزك تخلي بنت مبتصلش
تصلي ، يعني دي مش محتاجة معجزة.

عايزك بنت مش محجبه تتحجب ، بنت بتلبس
ضيقة تلبس واسع ، بنت بتسمع أغاني تبطلها ،
بنت مبتحفظش قرآن تحفظ قرآن ؛ العادي
الساهل.

■ انا مش بقولك بقى إيه ... أشرحي كتاب فقه،
ادي إجازات أشرحي لهم الموارديس ، انا عايز
بنت تتغير بس تبقى إنسانة مسلمة صالحة
يعني مش لازم تبقى إنت الجامدة.

■ ثم إن الدعوة هو أنا ضروري أنا إلهي أقول
كل حاجة هي بعض الناس بيعتقد لما أقوله
أشتغل في الدعوة في الجامعة بيعتقد إن أنا
بقوله أنت كن الداعية والشيخ.

لأ طب ما أنا ممكن أكون وسيلة بس، بمعنى
إن أنت البنات بتحبك تمام؟ ولك تأثير عليهم،
بس أنت فاضية معنديش معلومات كثير فاللي
أقدر أقولهم يا بنات مثلاً اسمعوا علاء حامد
، اسمعوا محمد الغليظ اسمعوا فلان أو فلان.

■ دي لوحدها خلاص أنت كده عملت دور
كبير وأنا بقى بتختاري لهم دروس معينة؛
تسمعي الدرس ده، اسمعي الدرس ده مش
لازم أنت تكوني اللي عارفة كل المعلومات.
تمام؟

■ لكن مين فيكم متقدرش تكلم بنت في صلاه ،
في حجاب ، في أغاني ، في صحوبية ، في
قلة أدب في يعني حاجات سهلة يعني مش
صعبة ، فلو انت قدرتي تأثري على البنت في
الافكار دي ؛ وبعد كده دلتيها على مجموعة
من الدعاة الشباب ؛ وبعد كده عرفتني تدخلها
معهد من المعاهد الاونلاين زي الفرقان أو كده
، فأكيد طبعاً إنت عملت الدور و مية مية يعني
وزيادة ، فمتشيلوش هم إن أنا أصل أنا
مبعرفش أتكلم، أصل أنا مبعرفش أقول إيه.

في إيه يا جماعه... يعني الموضوع بسيط يا
جماعة ، متعقدش الدنيا يعني الموضوع مش
معقد اوي للدرجة دي يعني أنت ليه بتحطي
العقبات الوهمية دي؟

■ بنتكلم عادي إحنا واحده بتكلم صاحبته هي
دي عايزة إختراع ؟ هي دي عايزة تحضير ؟
هي دي عايزة إن أنا أبقي مفوه وبتاع ؟ هو أنا
بقولك اطلعي اتكلمي في المدرج !!

■ بقولك كلمي البنت اللي جمبك زي ما
بتكلميه في المواصلات عادي تمام ؟

■ يبقى اللي عايز أقوله إن مسألة الدعوة جوه
الجامعة مسألة مهمة جداً ، مهم جداً إن أنت
تركزي.

■ طيب أنا أدعو ازاي ؟ دعوة على مستويين.

بصوا بقى عشان ايه دي مهمة أوي دي ،
الدعوة على مستويين.

﴿المستوى الاول دعوة عامة : - إن أنت

بتحاولي تأثري على كل اللي موجودين وأنت
بتحاول تأثر على كل اللي موجودين ؛ بسلوكك
؛ بأبتسامتك إن أنت بتصلي قدام الناس
بشوفوك بتروح تصلي تيجي ؛ ادبك ؛
مراجعتك للقرآن كده ؛ ناس شايفينك بتسمع
دروس ؛ بتنصح الناس بتقول كلمة أحياناً في
السيكشن في المدرج فيها تأثير عام على
الناس.

﴿المستوى الثاني:- هو التأثير الخاص

بقى. التأثير الخاص ده هو أن أنا بستهدف
مجموعة معينة بأقرب منهم أوي وأحاول
فعلاً أعمل فيهم تغيير تام تغيير كامل، يعني أنا
مش ممكن طبعاً ادعو ثلاث مائة واحد في
نفس الوقت، إن أنا أغيرهم يعني وعشان أغير

بني آدم الموضوع بيأخذ مجهود فعلا ،لازم
اصاحبه ولازمه وأتابعه وأعرف ظروفه.
ومتابعة يومية عشان أحوله لإنسان ثاني، أنا
الثلث مائة دول هحاول أثير فيهم التأثير العام،
بالكلمات بتوزيع حاجات بسمتي بسلوكي
بشرحي، تأثيري العام بمواعظ كده بكلمة
طيبة، لكن لازم بجانب دي في التأثير
الخاص. إن أنت بتختاري كل سنة خمسة ستة
تمام الجو دي تبتدي تصاحبهم بجد، بس
بتختارهم بعناية بقى. يعني بتحاولي تختاري
اللي هم ظروفهم مناسبة معك، عشان أقدر أثير
عليهم، يا ريت قريبين من الإلتزام نفسه يعني
بحاول أشوف الأقرب يعني مثلا واحدة مش
ملتزمة بس أخلاقها كويسة، مش ملتزمة بس
حسيتها كده مقبلة، فدي أولى من اللي بعيدة

خالص، وتختاري اللي مثلا ساكنة قريب منك
أحسن دي هروح وأجي معها. ظروفها
الإجتماعية ذي ظروف في الإجتماعية في تآلف
بيني وبينها. اللي مثلا حسيت أن هي حباني
كده واتعلقت بي دي أولى من اللي نفرة منك،
اللي عايز أقوله إن أنا لما أختار الدائرة اللي
هعمل عليها التأثير الخاص بنقي كده خمسة
سنة سبعة يعني ما يزيدوش عن عشرة صعب
جدا يزيدوا عن عشرة. بس دول بختارهم بقى
بنقيهم لأن دول هصاحبهم بجد. وممكن تقعد
طول السنة، وممكن سنتين وتلاتة مع دول
قاعدين أحنا بقى مع بعض لغاية ما اطلع دول
ملتزمين إلتزام تام يعني خلاص غيروا كل
السلوكيات اللي مش كويسة بدأوا يطلبوا علم
بدأوا بيحفظوا قرآن هم أنفسهم شغالين في

الدعوة إلى الله، يبقى كده أنا حققت هدف
غيرت بني آدمين. وغير بقى أن أنا شغل
التأثير العام بتاعي ده على طول. والبني آدم
اللي فعلاً حسيت أن هو أتغير وصل أن هو
بقى شايل نفسه خلاص بشتغل على اللي بعده.
مش هقعد مع الناس دي نفسها للأبد يعني،
طيب تعالوا نقول نصيحة كمان. بسم الله
النصيحة اللي بعد كده وهي للعموم كلكم
وللبنيات خصوصاً، وهي أهمية أن يكون
حفاظك على الصلاة في الجامعة هي قضيتك
الأولى. قضيتك الأولى إن أنت يوم ما بتنزلي
الجامعة مسألة أن أنت تحافظي على الصلاة
دي قضية مصيرية مفيش كلام. ما ينفعش أن
أنا أقول أن أنا رايح الجامعة علشان أرضي
ربنا زي ما قلنا المرة اللي فاتت، وعلشان بر

الوالدين وعلشان أدعو إلى الله. وبعد كده
مبصليش. يا نهار أبيض! إزاي كان هناك
عمل يعيق عن الصلاة فلا خير فيه ولا بركة
ولا هو طاعة ولا يصلح أن يكون طاعة،
إزاي كان يصد عن أعظم عبادة على
الإطلاق. الصلاة. الصلاة أم العبادات. ورأس
العبادات وأفضل العبادات إزاي كان هناك
شيء يمنع من الصلاة وضاعت الصلاة بسببه
في أي عمل هذا يعني بئس هذا العمل. فالبنت
خصوصاً طبعاً الولد صلاته سهلة سالكة
شوية. يعني الولد بننصحه يعني عادة بس
بنقول له والله حاول إنزل على وضوء وأنت
رايح الجامعة وحاول ما تنقش وضوءك
عشان ما تتكعبلش وأصل الوضوء أصل
بتوضأ أصل أنا مسرح شعري والجو دى.

والولد يصلي هيصلي في أي حنة يعني
والموضوع مش صعب. ومهم قوي الولد
يصلي في الجامعة جدا جدا يعني، وبنصح
بقى الولد كمان والولد والبنت يعني قبل ما
تنزل من البيت قبل ما تنزل من البيت اتوضى
خاصة بقى الشتاء داخل. اتوضأ وألبس
شراب، بس يا ريت يبقى شراب سميك شوية.
عشان فيه كلام على جواز المسح على
الجوارب الرقيق اللي هو عامل زي الشرابات
الحريمي دي الشفافة بلاش ده. نلبس شراب
سميك شوية. اللي هو ما بيوصفش البشرة.
شراب سميك شوية أحوط يعني. وأحنا كده
كده داخلين على الشتاء وكلنا حنلبس شرابات
سميكة. فالبنت والولد عشان الموضوع ده
بيكعبل قوي. يعني كوم وغسل الرجل كوم

تاني يعني كل الوضوء سهل. بس حنة غسل
الرجل دي بتبقى عائق كبير إن حد في
الجامعة والحمام أصلا متتيل على عينه ولسة
هقلع الجزمة واقلع الشراب واغسل رجلي
وادوس على الأرض واللبس الشراب
والجزمة...! لا خلاص أنا مش هصلي. في
ناس بتوصل للمرحلة دي، طب أنا أسهل على
نفسي، قبل ما تنزل الجامعة تتوضي أو أنت
تتوضي وتلبس الشراب على وضوء عشان
ينفع تمسح عليه، لأن ما ينفعش أمسح على
الشراب إلا لو أنا لابسه على وضوء، قبل ما
أنزل أكون متوضي، الخطأ الأولي إن أنا
أحاول أحافظ على الوضوء، يعني لو أنا
حافظت على الوضوء كده حليت نص
المشكلة. فاخُش الحمام كويس كده وما تاكلش

كتير وانزل متوضي والبس الشراب، كدا
حافظت على الوضوء؟ الحمد لله جبرت. طيب
نقضت الوضوء؟ المهمة مش صعبة هتتوضي
هتغسل بس وشك وايدك دي سهلة وتمسح
على الشراب بس. يعني سهلنا عليك المهمة
خالص. ده بالنسبة للولد يعني الولد دايمًا بتبقى
الكعبة بتاعته في الجزمة وهقلع الجزمة
وهقلع الشراب وبتاع وهتبل بقي... معلش لله
يعني إتعب شوية، والولد كده كده المسح على
الرأس بالنسبale مش بيزعله قوي، لأنه
هيسرح الدنيا هترجع زي الأول بسهولة،
فببقي مشكلته دايمًا إيه؟ ما أصل أنا مش
متوضي خلاص طب انزل متوضي، طب
أصل الجزمة والشراب طب اتوضي قبل ما
تنزل والبس شراب عشان تمسح عليه. لكن

البنات بقى قصة.. حوار عشان يحافظوا على الصلاة، كذا مشكلة، المشكلة الأولانية زي ما قلنا إن البنات أحياناً بتنزّل مش متوضية وده بيكعبها بقى طول اليوم. طب ما ننزل متوضيين! يعني دي المسألة الأولى، المسألة الثانية إن زي ما قلنا مسألة غسل الرجل دي عندهم مشكلة كبيرة، طب خلاص ننزل متوضين ولا بسين شراب زي ما قلنا سميك شوية، كذا حلّيت المشكلة دي. أحياناً بيبقى عندها مشكلة في إن هي تتوضأ تقول أصل شعري وهمسح شعري إزاي؟ الموضوع مش صعب يعني قول بعض العلماء إن مش لازم نمسح الرأس كلها، يعني ده مذهب مُعتمد عند كثير من العلماء، ممكن نمسح بعض الرأس فلو يعني مش هتقدري تقلعي الحجاب

وتمسحي راسك كلها ممكن تدخل يديك من تحت الحجاب كده وتحاولي تمسحي جزء كبير من الرأس أو أغلب الرأس من تحت الحجاب كده وترجعيه تاني وتشديه أو تشدي النقاب وخلاص يعني الموضوع مش صعب. بل بعض العلماء بيجوّز _أي قال أنه جائز للمرأة_ أن المرأة تمسح على الخمار إذا شق عليها نزعه. فاحنا بنقول خلينا في الأحوط لو معنى عرفتي تقلعيه يبقى خير وبركة، طيب لو صعب أصل فيه ناس، أصل ممكن حد يشوفني، أصل أصل.. يبقى إيدك من تحت كده ومسحتي يبقى خلاص هي مرة واحدة، طيب لا مستحيل مش هعرف وبتاع فـ على قول بعض أهل العلم يجوز المسح على الخمار في حال المشقة أو لو ما فيش مشقة يبقى لأ بلاش

أحسن. فحلت لك مشكلة كبيرة ثانية وهي
مشكلة مسح الرأس دي. طيب لا ده فيه
مشكلة تالته يا عم الشيخ إيه؟ أنا هصلي فين؟
هصلي ازاي؟ طيب في حاجتين مهمين لازم
يكونوا معاك وانتى رايحة الجامعة لو
معملتيهمش يبقى انتى الصلاة أصلا مش في
بالك، يعني واحدة معملتش اللي أنا هقوله ده
يبقى هي أصلا مش عاملة حساب الصلاة،
إجابة على سؤال بعض المستمعين «» لأ
الشراب لو ما بيغطي العضمتين البارزتين
دول ميفعش تمسح عليه لازم يغطي
العضمتين اللي جنب الرجل لازم يكون أعلى
منهم، أما الشراب اللي هو الصغير قوي ده لا
ما ينفعش نمسح عليه. نرجع لكلامنا طيب انا
بقول دلوقتي حاجة لو ما بتعملهاش يبقى انتى

أصلا مش في بالك الصلاة معلش مع
احترامي لكل بنت؛ 1- إن انتِ تاخدي معاكِ
المصاية البلاستيك، مصاية بلاستيك الصغيرة
دي اللي هي ملهاش وزن تقريبا يعني مصاية
بلاستيك صغيرة جدا، نمرة اتنين...طيب
الأول في واحدة بتسأل على مسحة على الكم؟
لا دي ما حدش قالها دي، دي ما حصلتش،
مفيش حاجة اسمها المسح على الكم. المسح
بيكون على الشراب اللي هو سميك ومغطي
الكعبين اللي هم العضمتين دول، لو أنا لابسه
على وضوء كمان لو مش لابسه على وضوء ما
ينفعش. وبعض العلماء زي ما قلنا بيجاوز
المسح على الخمار في حال المشقة. لكن ما
فيش حاجة اسمها مسح على الكم. ما فيش
مسح على الكم. طيب نرجع ثاني»» حاجتين

لو مبتعلميهمش يبقى انتي مش مهتمة بالصلاة
قولنا أول حاجة المصلية الصغيرة...

أصلي في أي مكان هتعامل، نمرة اتنين معك
إسدال صلاة، لو أنت لبسك يعني مش قد كدة،
أو عايزة تبقي مستورة بقي جامد بقي، لأن
مثلاً مثلاً.. ولسة هنقول مسائل في اللبس دوت
مسألة مهمة يعني، معك إسدال صلاة المهمة
خالص، إن أنت لو لبسك مش واسع هتحتاجي
إسدال الصلاة، طب أنا هصلي فين؟ أولاً
دلوقتي أظن المساجد بتاعة الكليات كلها
فتحت، صح؟ أظن مش صعب بقت سالك جداً
و بقي فيه مصلى بنات في الجامعة، هتصلي
عادي، لا ما فيش مصلى وقافلينه، بعيد أوي
على ما أروح له وأجي، صلي في أي مكان،
صلي في أي مكان، تعالي كدة، أي غرفة

فاضية، أي سكتشن فاضي، روي جوة كدة و
على جنب بعيد كدة، وحتي المصالية
البلاستيك، الله اكبر صلي، أصل بتكسف ما
فيش حاجة اسمها بتتكسفي صلي وخلص،
طب إفرض بقى حد شافني؟ دي مشكلته هو،
مش مشكلاك أنت، يعني لو مرأة اضطرت
تصلي ممكن يُحتمل إن راجل يشوفها، هل
ينفع ولا ما ينفعش؟ ينفع طبعًا، والمشكلة عند
الراجل مش عند الست، هو اللي يلزمه يغض
بصره، هو اللي يلزمه ما يبصش، لكن أنت
لازم تصلي، لو قفلت خالص، هصلي في
مكان يحتمل إن يبقى فيه راجل ينظر، ملكيش
دعوة، أنت خدي إحتياطك على قد ما تقدر،
خدي ساتر خليه في ضهرك ساتر بتاع، خلي
حيطة جنبك، كل اللي نقدر عليه نعمله، و في

الآخر هتصلي برضو، راجل بقى بص ما
بصش، دي مشكلته هو ما لناش دعوة بيه،
لكن لا يجوز إن أنا أصلي طالما إحتمال في
راجل يشوف، لأ! بالعكس لازم تصلي مهما
كان، النبي عليه الصلاة والسلام في المسجد،
لما كان في المسجد نبوي؟ آه كان النساء ورا
والرجالة قدام، بس ما كانش فيه فاصل بينهم،
يعني ممكن أي حد يبص، ودة لم يمنعهم إن
هم يصلوا، تمام؟ المشكلة اللي بعد كدة عند
البنات، هقول كذا مشكلة لسة، آه ممكن بنت
معاها بنت صح، تستر على أختها، تيجي
معاها زميلتها تقولي لها طب أنا هصلي و
إستريني، وبعد كدة أنت صلي وأنا أسترك،
سالكة يعني مش صعبة، طيب، المشكلة الثانية
عند البنات، إعتقاد بعض البنات إنه ما ينفعش

تصلي وهي حاطة ميك أب، يعني هي متوضية ماشي؟ هي متوضية، بس هي حاطة ميك أب، فبتعتقد إن ما ينفعش أصلي وأنا حاطة ميك أب، ودة غلط، يعني بغض النظر عن الميك أب نفسه يعني، يعني الميك أب طبعًا الميك أب دة ما ينفعش يتحط برة، يعني قدام الرجال الأجانب، يعني ما ينفعش واحدة تحط ميك أب في الجامعة أصلاً، تمام؟ إنما الميك أب ده للنساء بس أو للمحارم، جوزك، المحارم أبوك، أخوك، والنساء كلهم، لكن، راجل غريب مش محرم يشوفك بالميك أب، ما ينفعش، بس نفترض واحدة نزلت بالميك أب، هل معنى إن هي عملت غلطة زي الميك أب نقول لها ما تصليش؟ يعني نخلي مصيبتها مصيبتين؟ والمصيبة الثانية اسوأ من الأولى؟

ترك الصلاة اسوأ من التبرج نفسه، لأ البنت
حتى لو صاحبتك عاملة ميك أب متوضية، جه
وقت الصلاة هتقولي لها صلي، ينفع أصلي
بالميك أب؟ ينفع أصلي بالميك أب، طب أنا
حاطة مونيكير، طب أنت إتوضيتي قبل ما
تحطيه؟ آه كنت متوضية، بعد كدة حطيت
مونيكير وبعد كدة نزلت، بس هي متوضية،
ينفع تصلي به؟ اه، ينفع تصلي به، تصح
الصلاة؟ تصح الصلاة، هل ليها عذر ما
تصليش؟ ملهاش عذر ما تصليش، لكن
هتُصَح بعد كدة الميك أب دة ما ينفعش وبتاع،
قدام الرجال والكلام دوت ما يصحش وبتاع،
تمام؟ فدي مسألة تانية يعني، لكن ينفع تصلي
بالميك أب، طب بقى كان لازم تتوضى، مش
متوضية، ولازم تتوضى، هنا هيبقى مشكالتنا

مع الميك أب في المونيكير بقى دلوقتي، لان
ما عدا ذلك من الميك أب تقريبًا مش بيمنع
وصول الماء، غالبًا كل المساحيق بتاعة الوجه
ديت أو كدة، دي مش بتمنع وصول الماء
يعني، بس غالبًا الحاجة الوحيدة المشكلة هي
المونيكير، فالبنت إذا كانت كدة لازم تنبهوا
بعض يا بنات، يا بنات النصيحة أصلًا ما
تطيش الحاجات دي خالص، مينفعش، بس
واحدة لسة على ما ربنا يتوب عليها من
الموضوع دوت هتقولي لها بس خلي بالك
يعني حتى لو نزلتي

نزلت بيه انزلي متوضية عشان لو نقضتي
وضوءك مش هينفع تتوضي وانتني حاطة
المونيكير دوت الصلاة مش هتتفع لإنه بيمنع

وصول الماء فممكن ده يخليها حتى في
المونيكير متحطش مونيكير تقولك طب
خلاص مش هحط المونيكير عشان الصلاة
يبقى ايه طلعتا طالعة معاها، عدينا حنة معاها
وبعد كده نخليها تخف بقى الميك اب ده
خالص وريحي. طب أنا لا أصل أنا لو أنا
غسلت وشي الميك اب هيسيح. أنا مالي! أنا
مالي! أحسن ما وشك يسح في نار جهنم.
أحسن ما وشك كله يسح وجلدك يسقط في نار
جهنم. مش مهم الميك اب مش مهم الكريم اللي
أنت حاطه على رأسك. مش مهم الجيل اللي
مثبت رأسك. المهم الصلاة. شعرك ده يتحرق
في نار جهنم كله لو مصلتش. وشك ده هيسح
في نار جهنم لو مصلتش. ما الميك اب يسح
ولا يروح في ستين داهية. أنا مالي محدش

قال لك حظيه من الاول. تمام؟ فلان احنا يا جماعة نعظم قدر الصلاة. ولما ربنا يرى إن واحدة فعلا عملت كده لله والله يعني يرزقها الهداية. ويحبب إليها الصلاة. وبعد كده فعلا تبقى خلاص مش هحط ميك اب عشان موضوع الصلاة والوضوء والكلام ده وتبقى الصلاة فعلا نهيتها عن الفحشاء والمنكر بالطريقة ديت. تخيلوا! طيب. يبقى انا هبقى عندي مشكلة واحدة في البنت اللي من الميك اب بتاعها مونيكير وكمات مش متوضية. فمفيش حل غير إن هي تشيله. فيه بقي مادة بسرعة كده تشيل الميك اب ده تشيل المونيكير ده خالص... المواد اللي بتدوب المونيكير ديت وعملناها ماشي. ممكن انت برضو خلي معاك مادة زي دي يمكن واحدة صاحبك تتزلق في

صلاة ومعهاش مزيب تقولي لها خدي ادي
المزيب تك تك تك تك وتروح تتوضأ
ويبقى انت عملت فيها خير.... تعالوا نشوف
مشكلة كمان. كل البنات كلها البنات مشاكل.
بصي الراجل صلى على طول يعني طلع من
البيت راح صلى. البنات بقى حوار بقى عشان
نصلي بقى. اللي جاي ده لازم تركيز عشان
المسألة دي ايه؟ صعبة شوية. طب خلىنا
نجاوب على السؤال ده الاول. هل ينفع واحدة
تصلي بالنقاب؟ مسألة على.. نقاب يعني
مغطية وشها. لو هي فيمكن أن يطلع عليها
رجل يبقى أصلا لازم هتصلي بالنقاب طبعاً.
لو هي في مكان مستحيل يطلع عليها رجل
ومفيش غير النساء. يعني لا يستحب ذلك. لا
يستحب ذلك. الصلاة صحيحة

بالنقاب؟ صحيحة طبعاً بس لا يفضل ذلك.
الأفضل أن تكشف الوجه والكفين عندما
تصلي. تمام؟ لإن دي مش عورة الصلاة.
يعني الوجه مش عورة في الصلاة. الكفين
مش عورة في الصلاة. هي عورة خارج
الصلاة على قول بعض أهل العلم. تمام؟ لكن
الصلاة صحيحة عموماً. خالينا بقى في
الأصعب. بنت متوضية. وكله تمام. خلاص؟
لكن لكن لابسة ضيق. لكن ايه؟ لابسة ضيق.
يعني لابسة فوق كده ضيق شوية. لابسة
بنطلون ضيق شوية. بس ساتر. مفيش حاجة
من جسمها باينة. هو لو فيه حاجة من جسمها
باينة. زي بنطلون مثلاً فيه فيه فتحة كده مبيينة
حتة من الفخدة حتة من اي حتة. تمام؟ البتاع
قصير اوي ومبين الجزء دوت. في فتحة كده

لا مش هينفع خالص تصلي طالما فيه جزء
من عورتها مكشوف. مش هينفع. هنا لازم
تستره لازم تستره بأي شكل. احنا بنتكلم في
الحالة الثانية. لا هي مفيش حاجة إلا الوجه
والكفين بس اللي مكشوفين. يعني مكشوف
الوجه والإيه والكفين. بس اللبس ضيق.
ضيق. لابس ضيق شوية.. ضيق من هنا
ضيق من تحت. ومفيش اسدال. ومش عارفين
نتصرف لها في اسدال. ومش عارفين نعمل
ايه. وهي عايزة تصلي ينفع تصلي ولا لا؟
فدي أخطر مسألة. ينفع تصلي ولا لا؟ هل _
المسألة كالتالي_ هل يجوز الصلاة بالملابس
الضيقة؟ الساترة هي ساترة، مفيش حاجة
باينة. لكن ضيقة. نقول يجوز الصلاة
بالملابس الضيقة. وتصح الصلاة بالملابس

الضيقة. ولكن هذا أمر مكروه يتنافى مع
الأدب مع الله. ثاني. صلاة بالملابس الضيقة.
هل تصح؟

فده طبعاً ده فتوى يعني المذاهب فتوى ابن باز
والكلام ده أنا جاييه لكم يعني إيه بعد دراسة
يعني، تصح الصلاة بالملابس الضيقة، وتقبل
الصلاة من الملابس الضيقة. إذا كانت ساترة،
إذا كانت ساترة ولكن يكره ذلك، وهو من سوء
الأدب مع الله في الصلاة، طبعاً أحنا بنقول
الكلام ده كحل حل أخير، حل أخير مع بنت
عايزة تصلي، عندها استعداد تصلي بس هي
بتقول لك هي لابسة ضيق، هل أنا ممكن أقول
لها ما تصليش؟ أنا أقول لها ما ينفعش
تصلي؟ ويبقى أنا السبب أن هي ما صلتش،
عشان أنت مثلاً تخوفها من التبرج، تقولي لها

ما تصليش مش هيتقبل منك، ويبقى أن هي ما
صلىتش ميزان سيئاتك أنت، لأن هي بتقول أنا
عايزة أصلي. تمام فإزاي بقى يبقى أنت عشان
تخوفها من التبرج تقولي لها ما تصليش، ما
ينفعش تصلي، لا أنت لازم تساعديها، تقولي
لا صلي صلاتك إن شاء الله تقبل، وبعد كده
بعد الصلاة تقعدى معها تنصحيها في اللبس
وكده تمام، فكون إن أنا بقول لها صلي طبعاً
مش تشجيع على التبرج زي ما حضرتك
بتقولي، بالعكس ده أنا بأساعدها تتقرب إلى الله
علشان ده المدخل اللي بعد كده هتخلها منه إن
ما ينفع طب تقفي قدام ربنا كده طب ما إيه
رأيك تلبسي كده وكده لكن لو قلت لها ما
تصليش يبقى هي جمعت مصيبتين، جمعت
مصيبتين تبرج وترك الصلاة طب الصلاة هي

اللي بتتهي عن الفحشاء والمنكر. فلو قلت لها
ما تصليش شكرا، بعد كده حيتدي بقى أدي
لها حلول، طب ما تجيبي معك إسدال، طب
ما تلبسي أصلاً واسع، طب لغاية ما تلبسي
واسع أنا هجيب لك إسدال معي، هجيب لك
إسدال هدية، وخليه معك في الشنطة، والبنات
تخط في المسجد إسدالات عشان البنات اللي
زي دول. في بنات بتقرف تلبس إسدال مكان
واحدة. خلاص في إسدال هتبقى شايلاه
لزملاك أو بتجيبه لها أو تديه لها هدية تحطه
لها في شنطتها عشان ما تطلعوش أبداً، في
حلول كتير، لكن مش منها إن أنا أقول لها ما
تصليش غلط، اه هو مشكلة اللبس الضيق في
نظر الرجال، يعني دائماً بيقول لك في فرق
بين النظر وعورة الصلاة، يعني ليه بنقول

اللبس البنات الضيق حرام مش عشان هو مش؟ ساتر طب ما هو ساتر، هو في حاجة باينة؟ ما فيش حاجة باينة. بس هو مشكلته هنا مش في الستر، مشكلته هنا في الفتنة، إن هو ستر بضيق فضيق وصف العورة فأدى إلى فتنة، هو ستر يعني العورة أنا مش شايفها أنا مش شايف جلدھا، بس ستر بضيق فالضيق ووصف العورة، فلما وصف صار فتنة للرجل عشان كده الضيق ما ينفعش قدام الرجال لكن بالنسبة للصلاة الأمر أيسر لأن هي واحدة واقفة قدام ربنا تمام، فهنا مسألة الضيق والفتنة مش موجودة، بس هنا بنرجع نقول هو ستر، لأن الواجب في الصلاة ستر العورة وهي اتسترت، بس اتسترت بضيق فبنقول الصلاة تصح لأن العورة اتسترت فعلا لكن اتسترت

بالضيق سوء أدب مع الله ويكره جداً الصلاة
باللبس الضيق، لكن الصلاة صحيحة، مسألة
قلت لكم مسألة مهمة وهتتلبطوا فيها والناس
بتستغرب إزاي الكلام ده لكن دوروا ورايا،
اكتبوا على النيت حكم الصلاة بالملابس
الضائقة، اكتبوا عادي على الجوجل كده حكم
صلاة المرأة بالملابس الضيقة، شوفوا الفتاوى،
كل الفتاوى هتقول لك يجوز فبنسهل على
الناس، مش بادعوا للتبرج يعني وبعد كده
بأقول لك أنت بقي خليكى داعية هي زميلتك
لما تشوفك بتسهلي لها الصلاة تشتري لها
إسدال. هتفرق معها كثير، لكن المهم مسألة
حفاظ الشباب والبنات على الصلاة في الجامعة
مسألة هامة، المسألة الثانية أن هل طب أنا
أفرض مش عارف أصلي الصلاة على في

أول الوقت مش مشكلة، يعني خلاص لو في
عذر ممكن أحنا معنا وقت المهم ما تجيش
الصلاة الجاية لك إلا لما تكوني صليت يعني
لو أخرنا الصلاة شوية علشان أنا المحاضرة
مش عارفة أطلع، فهصلي بعد الميعاد بنص
ساعة بعد ميعادها بساعة بعد الميعاد بساعتين
تمشي، بس الكارثة أن يخش وقت الصلاة اللي
بعديها بس صعب قوي تقنعني أن المحاضرة
هتأخذ من قبل صلاة لبعد الصلاة اللي بعديها
ولو فيه حاجة كده حاولي تلاقي مخرج تطلعي
في نصها تحضرها في وقت تاني تظبطي
جدولك أن كل محاضراتك والسكاشنك ما
بيأخدش صلاتين على بعض اتصرفي، لو
عايزة تصلي الصلاة في وقتها هتتصرفي
،هتلاقي حل تمام لكن مسألة ما أصليش بقى

وبتباع لا، والمواصلات برضو نضبط
المواصلات على الصلاة، ما تجيش واحدة
بقى قبل المغرب بخمس دقائق تروح راكبة
المواصلات، ما أنا هوصل بعد العشاء طب ما
تستتي المغرب يأذن وصلي وبعد كده اركبي،
ليه عملت في نفسك كده عادي أصبر شوية
عشان ما تكبلش الكعبة دي وبعد كده يقول
أصل أنا ركبته وبوصل طب أنا ما نصبر
شوية صلي وبعد كده نركب. تمام - ومنها
البنطلون طبعاً- (رد على سؤال أحد
الحاضرين) المهم يعني إيه الصلاة. الصلاة
الصلاة صلاة في الجامعة بنات مهمة جداً،
الصلاة في الجامعة يا شباب، إيه كفاية كده؟
الساعة كم؟ الساعة عشرة وربع -في المدرسة
صلي جوة الفصل صلي جوة الحوش، صلي

في الفسحة صلي على جنب، صلي في أي مكان- (رد على سؤال أحد الحاضرين) معي مصلية معايا إسدال صلي في أي حنة، تمام؟ أخيراً بقى بسرعة عشان نقفل بقى المواضيع بموضوعين بسرعة، الموضوع الأول هو: إياكم والأعمال المختلطة في الجامعة، يعني الأنشطة الطلابية بقى والجودة، نصيحة إبعدي عن الأعمال الطلابية حتى لو كانت خيرية اللي فيها إختلاط جامد مع الولاد؛ لأن الموضوع ما بيسلمش، وأغلب قصص الحب اللي بتوصلني خاصة ما بين الملتزمين اللي هم -أو شبه ملتزمين يعني- كانت بدايتها أعمال مختلطة في الجامعة، وأعمال صالحة وأعمال خيرية، نبعد عن القصة دي، ولو أنا عايزة أشارك في عمل خيري في الجامعة،

أدور على وظيفة ما فيهاش إختلاط، يعني
أقول لهم مثلاً إيه الحتة اللي فيها بنات بس؟
كذا، طب أنا معاكم في كذا، شاب إيه الحتة
اللي فيها ولاد بس؟ كذا، أنا معاكم في كذا، أما
بقى الحتة اللي فيها ولاد على بنات طول
النهار دي، إهربى منها، إسمعي الكلام! وأنت
إهرب منها، إسمع الكلام! إن ديت شرعة للي
إيه إعملوا اللي أنتم عايزينه، إحنا هنا تحت
مظلة عمل خيرى، وإحنا طيبين وعمل
إسلامي، والخراب كله بيحصل في الحتة دي،
آخر حاجة، هي مش آخر حاجة هو حاجات
كثير، بس أنا مش لاقى وقت أقول يعني اللي
عندي كله كالعادة، عايز أقول لكم إحذروا من
فتنة الفانداي، الفانداي، الضغط النفسي اللي
بيحصل فانداي بقی والجامعة وهنتخرج،

ولازم أحضر، وأصل لازم، طب أعمل إيه؟
طب ما أنا لازم أحضرها، مش لازم تحضري
خالص، خالص! أنا في أيام جامعتي في ألفين
وسنة ما حضرتش حفلة التخرج، عشان
عارف إن هم هيشغلوا فيها موسيقى بس،
يعني زمان ما كانش فيه لا مهرجانات، ولا
مغني بيجي، ولا حاجة، بس كان مجرد بس
الحفلة هيبقى فيها بنات كتير، وهيبقى فيها
شوية موسيقى، ما حضرتهاش، ولا إتصورت
صورة مع الجامعة، مع الطلبة أصلاً، عادي
أنا خدت شهادتي ما شفتهمش تاني، ملناش
دعوة إحنا بالفان داي، ملناش دعوة بالفوتو
داي، ملناش دعوة بالجودة، في الآخر بعد كل
اللي أنا عملته في الجامعة ديت، طلب علم،
ودعوة إلى الله، وصلاة وبتاع، آجي بيبقى

الختام فجر، وبنات لابسين تيشيرتات ضيقة،
وتيشيرتات لون واحد وقاعدين يترقصوا قدام
المغني وبتاع، فأنا هروح عشان أنا بقى نفسي
أحضر الفنان داي والفوتو دي بلا خيبة! لأ!
وفي حل تاني إن إحنا نعمل مبادرة في
الجامعة -زي ما في ناس كتير بيعملوا- بس
هي المبادرة دي بدري، قبل ما العيال الفاسدين
والبنات الفاسدين، يخلصوا ويحجزوا فان داي
ويتفقوا عليه ويلموا تبرعات من الجامعة،
بدري بدري دلوقتي في أول السنة نعمل
مبادرة، إيه رأيكم يا جماعة نعملوا عمل
خيري بدل الفنان داي، بدل ما كنا هندفع مثلاً
عشرين خمسين ألف جنيه في الفنان داي، طب
ما نعملهم ونجيب بيهم جهاز لمستشفى
الأورام، نجيب بيهم جهاز لمستشفى الحروق،

نعمل بهم بير في أفريقيا، نعمل بيهم عمل
خير، و كلنا يوم تسليم البير دة، ييقى هو دة
الفان داي بتاعنا، كل الجامعة يلا بينا ولاد
وبنات حتى هو يوم يعني مش هيقى فيه فساد
أوي، هناخدوا بعض ونروحوا يومها نسلّموا
المستشفى الجهاز، ونبقى فرحة وعمل صالح
لينا، نعملوا افتتاح للجهاز دة في مستشفى
الأورام، مستشفى السرطان، مستشفى
الحروق، بدل ما نعمل الإيه الزفت داي دوت
وبتاع ويبقى إيه أحسن، مبادرة! أو البنات مع
نفسهم يعملوا إعتراض، إحنا مش عايزين
الفان داي دة مش عايزينه مع الولاد، إحنا
هنعمله لوحدها فسحة لوحدها، وتعملوا لوحدهم
فسحة كدة هادية، مفيهاش حاجة غلط،
وتجمعوا بعض و تروحوا مكان وتاكلوا

وتشربوا وبتاع وتتبسطوا، من غير موسيقى،
من غير رقص، من غير إيه، من غير مغني،
من غير أي حاجة، هو لازم أنا أمشي في
المسار المتخلف دة؟ يعني ما ينفعش أبقي ليا
شخصية؟ "لا يكن أحدكما إمعة إن أحسن
الناس فليحسن، وإن أسأئوا يسيء مثلهم"، لا
إن أحسنوا يحسن و إن أسأئوا يجتنب إسأئتهم،
فإما تعملوا مبادرة من الأول تلغوا الفان داي
خالص ويبقى كتر خيركم وتعملوا بديل حاجة
صالحة نعملها، أو لو فعلاً خالص إتفرض
علينا الفان داي دوت، والجامعة ماشية في
الإتجاه دوت، يبقى ممكن أنتم تعملوا ضغط
في إتجاه تاني، إحنا مش معاكم، احنا بقى
مجموعة بنات، مجموعة شباب، إحنا هنعملوا
لنفسنا داي مع نفسنا و ملناش دعوة بيكم، يا

جماعة اللي عايز يجي معانا يجي إحنا نعمل
يوم محترم مفهوش مخالفات وهنتبسط وبتاع
وخلص، هتلاقي ايه، انت هتلاقي زلزلتي
الدنيا، هتلاقي كله هيفكر، كله هيقلق، فلأ
نعملوا تغيير من دلوقتي، تمام؟ أما بقى لو
وصلنا مفيش حل، إن أنا ما أشاركش، طبعًا ما
أشاركش. طظ في فان داي و الفوتو داي و طظ
في اليوم دة و طظ في صوره، وأنا في الآخر
بعد كل دة هضيّع كل دة بختام سيء؟ أنا إن
شاء الله أكون لوحدي، إن شاء الله كله يالس
علياء، ولا يهمني، ولا يهمني، في النهاية يا
شباب، الجامعة هي صفحة من صفحات
العبودية بالنسبة لك، خمس سنين، خمس سنين
في حياتك اللي هي كلها ممكن تبقى خمسين
سنة، يعني عشر حياتك هتقضيها في الجامعة،

عشر حياتك هتقضيها في الجامعة، تخيل!
ممكن تعمل قصة عبودية عاملة ازاي في
الأيام دي والعكس ممكن الأيام دي تبقى في
ميزان سيئاتك لدرجة إيه يوم القيامة، وفي
فترة الجامعة دي هتتسأل عنها لوحدها يوم
القيامة، ليه؟ لأن من أسئلة يوم القيامة عن
عمره فيما أفناه، وعن شبابه فيما أبلاه -يعني
فترة الجامعة-، فترة الجامعة دي سؤال لوحده
يوم القيامة، سؤال لوحده يوم القيامة، فترة
الجامعة عملت فيها إيه؟ فتخيل واحد لما يتسأل
عن شبابه فيما أبلاه فيما أفناه يلاقي فيه فوتو
داي فان داي، يلاقي فيه إختلاط، يلاقي فيه
صحوبية بنات، يلاقي فيه ترك صلوات، إيه
الموقف؟ موقف هيبقى صعب، وأنا معنديش
إستعداد إن أنا اقف في الموقف دة، النهاردة

هاخذ قراراتي أنا لوحدي، أنا هعمل الصح
اللي يجي معايا ييجي، اللي مش هيجي مش
هيجي، وهسمع كلام الشيخ علاء، والاتنين
لايف اللي قاله لنا كتر خير، وهنشره، وهقول
للناس كلها تسمع اللايفين دول، ويبقى هو دة
إيه الحسنة اللي أنا عملتها في الجامعة، أنا
بحبكم في الله عشان كدة بقول لكم النصايح دي
وزي ما قلت لكم المرة اللي فاتت، اللي أنا
بقوله لكم دة محدش هيقوله لكم، محدش هيقوله
لكم أنا جاي لكم من جوة المطبخ، أنا جاي لكم
أنا المطبخ نفسه، فإسمعوا كلامي، إسمعوا
كلامي، لأن ما حدش هيقول لكم الكلام دوت،
تمام؟ ربنا يرضى عنكم يا رب، ويبارك فيكم،
أنا بحبكم في الله عشان كدة بحاول انصحكم،
وأرجو من الله إن أنتم تكونوا أحسن ناس،

ربنا يوفقكم لكل خير، وربنا يرضى عنكم
ويحبكم، إن شاء الله هنتقابل على خير في
لايف تاني ، وانا سعيد بلقائكم الطيب ، ربنا
يجمعنا دائماً على الخير ، سبحانك اللهم ربنا
وبحمدك أشهد أن لا إله إلا أنت أستغفرك
وأتوب إليك، السلام عليكم ورحمة الله.